

Naqqiut

Siunnersuut ulloq 18. august 2020-meersoq taarserpaa (Oqaaseqatigiliornernik aaqqiisoqarlunilu ersarinnerulersitsisoqarpoq, taamatullu malitsigisaanik allannguisoqarlunilu siunnersuutip aaqqissuunneranik allannguisoqartoq.)

Siunnersuummut nassuiaatit

Nassuiaatit nalinginnaasut

1. Aallaqqaasiut

Siunnersuummi matumani, ukiup ninneraniilli soraarnerussutisiaqalernissamut aaqqissuussinnermut peqataasussaataaneq pillugu Inatsisartut inatsisaata kingunerisaanik politikikkut allatigullu oqallinnerit kiisalu misilittakkat inatsisip aqunneqarneranut atatillugu maannamut misilittagarineqalersut, tunngavigineqarput.

Oqallinnerni apeqqutit arlallit eqqasiorneqarput.

Innuttaasut isertitakitsut akileraarummut procentiliussamut ilassusiisoqarluni skattekortimik tigusaqarnerminnut ilutigitillugu soraarnerussutisiassaminnut ileqqaarnissaat ilungersunartoq, ilaatigut tikkuarneqarpoq.

Innuttaasut isertitakitsut soraarnerussutisianut aaqqissuussinnerminnut ingerlaavartumik akiliisarlutik aammalu ataatsikkut ukiumut siusinnerusumiittumut pisussaaffimmik sinnerinik akilersuinissartik ajornakusoortissinnaavaat. Innuttaasup isertitakitsup assersuutigalugu ineqarnermut akiliummut akiliutinik kinguaattooruteqarluni akiitsoqalertarneranut, ajornartorsiut arlalitsigut sanilliunneqarsinnaavoq. Pisuni taakkunani innuttaasoq taamatuttaaq, pineqartup akiitsuminik akilinngitsuukkanik annikillisisiniarnerminut ilutigitillugu, ineqarnermut akiliummut ingerlaavartumik akiliisariaqarpoq. Tunngaviusumik ajornartorsiut tassani pineqarpoq, innuttaasut ataasiakkaat annertuumik sunniuteqarfigisaat aammalu tamanut atuuttussamik naleqquttumik aaqqiissutissarsiniarnissaq ajornakusoortorujussuulluni.

Isertitanut killiliussat 100.000 aamma 150.000 koruunit atuuttut qaffanneqartariaqarnerisut, taamaalilluni innuttaasut isertitakinnerusut arlallit nammineq soraarnerussutisiassaminnut ileqqaartussaajunnaarsinneqarlutik, Naalakkersuisut isumaliutersuutigaat. Siunnersuummik taamaattumik saqqummiussisoqanngilaq. Tamatumunnga pissutaasut arlaqarput. Ullumikkut amerlasoorpassuit sulisartunut isumaqatigiissutit tunngavigalugit atorfinitsinneqarsimapput, taakkunani soraarnerussutisianut aaqqissuussinnerminnut akiliisarnissaq qulakkeerneqarluni. Tassani aamma suliassa qarfiit isertitakiffiusut iluanni atorfeqartunut tamanna aamma

atuuppoq. Naalakkersuisut isumaat malillugu sulisartunut isumaqatigiissutit tunngavigalugit atorfeqartut aammalu namminersortut imaluunniit sulisartunut isumaqatigiissutit avataanni atorfeqartut akornanni annertuumik assigiinngitsitsisoqannginnissaa pingaaruteqarpoq. Tulliullugu minnerunngitsumik isertitakitsut soraarnerussutisiaqalernerminni aningaasanik amerlanerusunik atugassaqaarnissaq annertuumik iluaqutigisinnaagaat, eqqarsaatigineqarpoq. Tamatuma saniatigut utoqqalinermi assigiinngitsumik inissisimanerup annikillisinneqaarnissaa siunnerfigineqarpoq, tamatumanilu minnerunngitsumik innuttaasut isertitakitsut soraarnerussutisiassaminnut ileqqaarnerminni tamatumunnga tapersiinissaat pisariaqarpoq.

Tamatuma saniatigut oqaatigineqassaaq, ilaatigut isertitakitsunut aningaasaqaarnikkut atugassarititaasut pitsanngorsarnissaannut arlalinnik suliniuteqartoqarmat. Tikkuarneqarsinnaavoq suliffeqaarnermut ilanngaat akuerineqarmat aammalu innaallagissamut imermullu assigiimmik akeqartitsineq atuutsinneqalerluni. Assigiimmik akeqartitsinerup malitsigisaanik assersuutigalugu Tasiilami ilaqtariit inersimasut marluk meeqqallu marluk ukiumut 8.000 koruunit angullugit sipaaruteqartussaapput.

Covid 19-ip ajornartorsiortitsinerata aallartinnerani ajornartorsiornerup aningaasaqaarnermut, minnerunngitsumillu nunatsinni suliffissaqartitsiniarnermut, qanoq sunniuteqaarnissaa aarleqqutigineqarpoq. Maannakkorpiaq ajornartorsiornerup sunniinerlunnera qujanartumik Kalaallit Nunaanni annikitsuinnaassasoq malunnarsiartorpoq. Taamaattoq ajornartorsiorneq pisortat aningaasaqaarnerannut annertoorujussuarmik kinguneqareerpoq aammalu ilaatigut sanaartornermut suliassaqaarfiup iluani allatut pingaarnersiunerimik malitseqareerluni. Kisiannili ukiuni aggersuni qaninnerni aningaasaqaarnikkut ineriartornerup nalornissutigineqarnerani, innuttaasut soraarnerussutisianut ileqqaarnissaannut piumasaqaatit annertusitinnnginnissaat naleqqussinnaavoq. Ileqqaarnissamik piumasaqaateqarnerup arriitsumik atuutsikkiartuaarneqarnerani innuttaasut atuinerminnik annertusititsinnaalissapput, tamannalu pitsaasumik suliffissaqartitsiniarnerup ineriartorneranut tunngavissiisinnaavoq.

Isertitanik A-nik tunniussisartut tamarmik tiguisussap soraarnerussutisianut aaqqissuussineranut akiliinissamik pisussaaffeqalersinneqarlutik, aaqqissuussinerup atuuttup allanngortinnissaa naapertuutissanersoq, Naalakkersuisut naliliipput. Taamatut aaqqiissuteqarneq iluaqutissartaqarpoq ajoqutissartaqarlunilu.

Iluaqutissartaasut annersaat tassaassaaq, innuttaasut amerlanerusut ileqqaarnissamut pisussaaffimminnik ingerlaavartumik naammassinnittalernerannik, taamaalillutillu ikinnerusut akileraarummut procentiliussamut ilassusiiviusumik skattekortimik tigusaqartalernerannik, aaqqiissutissap malitseqarnissaata ilimanaateqarnera.

Ajoqutissartaasoq annerpaaq tassaassaaq, innuttaasut isertitakinnerpaat soraarnerussutisiassaminnut ileqqaarnissamik pisussaatinnginnissaat, aaqqiissutissami tassani

ajornarteq. Taamaalilluni aaqqiissutissap kingunerisaanik aamma innuttaasut 100.000 koruunit inorlugit isertitaqartartut soraarnerussutisiassaminnut ileqqaartussaapput.

Ataatsimoortumik naliliineq malillugu, ilanngullugulu pingaartumik aaqqiissutissap innuttaasunut isertitakinnerpaanut aningaasaqarnikkut sunniuteqarnerlunnissaa eqqarsaatigalugu, immikkoortumi tassani siunnersuutip allanngortinnissaa pissutissaqanngitsaq Naalakkersuisut isumaqarput.

2. Siunnersuummi immikkoortut pingaarnert

Siunnersuutigineqarpoq piffissaq ileqqaarfiusussaq sivikillisinneqassasooq, taamaalilluni taanna ukioq aningaasarsiaqarfiusooq innuttaasup soraarnerussutisiaqalertussat ukioqalerfissaa ukiunik 4-nik sioqqullugu unitsinneqarsinnaalluni. Utoqqalinersiaqarneq pillugu Inatsisartut inatsisaanni § 1 naapertorlugu 2020-imi 66-inik ukioqalernerme soraarnerussutisiaqalertoqassaaq aammalu 1. januar 2021 atuutilersumik 67-inik ukioqalernerme tamanna pissalluni. Allanngortitsinerme siunertaavoq, innuttaasooq soraarnerussutisiaqalertussat ukioqalersooq, ukiuni aningaasarsiaqarfiusuni siusinnerusuniittuni naammattumik akiliisarsimannginneq pissutigalugu, soraarnerussutisianut aaqqissuussinermut akiliisartussaana ingerlaannarluni, pisut amerlassusaasa killilersimaarnissaat. Akiliinissamut pisussaaffiup soraarnerussutisiaqalertussat ukioqalernissaa ukiunik 4-nik sioqqullugu unitsinneqarsinnaanerata siunnersuutigineqarnera § 7, imm. 3-p allanngortinneqarneranut ataqatigiissillugu isigineqassaaq, takuuk siunnersuummi nr. 6, tassani taamatuttaaq ukiunik 4-nik killiliineq ilanngunneqarluni.

Soraarnerussutisianut aaqqissuussinerit suut atorneqarsinnaanersut erseqqissarneqassasooq siunnerfigineqarpoq. Siunnersuut malillugu Danmarkimi imaluunniit Kalaallit Nunaanni soraarnerussutisiaqarnissamut aningaasaateqarfinni, inuunermut imaluunniit soraarnerussutisiaqarnissamut sillimmasiisarfinni imaluunniit Kalaallit Nunaanni aningaaserivinni soraarnerussutisianut aaqqissuussinerit kisimik atorneqarsinnaapput. Taamatut aaqqiissuteqarneq arlalinnik siunertaqarpoq. Kalaallit Nunaanni suliffeqarnerup annertunerpaartaanni Danmarkimi imaluunniit Kalaallit Nunaanni soraarnerussutisianut pilersuisut atorneqareerput. Akileraartarnermut ingerlatsivik Danmarkimi soraarnerussutisianut aaqqissuussinerit akiliutit il.il. pillugit Danmarkimi akileraartarnermut oqartussanit paasissutissanik arlalinnik ukiumut ataasiarluni arlaleriarluniluunniit tigusaqartarpoq. Danmarkimi aamma Kalaallit Nunaanni soraarnerussutisianut pilersuisut annertunerpaatigut maleruagassanik assigiinnik malinnittussaapput (aningaasalersuinermik suliaqarneq pillugu inatsit aammalu nunani marluusuni taakkunani soraarnerussutisianut pilersuisut assigiinnik nakkutilliisoqarput (Finanstilsynet). Taamaalilluni aaqqiissutissatut siunnersuutigineqartumi suliaqarnikkut suliassatigullu iluaqutissartaasut annertupput. Tassunga ilanngutissaaq, nunani aaqqissuussinerit allat Kalaallit Nunaanni paasinnittarneq malillugu soraarnerussutisianut aaqqissuussinerit isigineqarsinnaanersut, akileraartarnermut ingerlatsiviup amerlanertigut nalileruminaatsittarmagu. Assersuutigalugu oqaatsitigut unammilligassartaqarsinnaapput, inatsisinut isumaqatigiissutinullu tunngaviusut nunani allani aaqqissuussinerit tunngaviusut il.il. paasiuminaatsinneqarsinnaallutik.

Soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaanni tjenestemandinut inatsisit arlallit naapertorlugit tunniunneqartartut ileqqaarnissamut tunngaviusuni ilaatinneqarnissaat pisussaatinneqanngilaq. Tamatumunnga pissutaavoq tjenestemandit tjenestemandinut soraarnerussutisianut aaqqissuussinermi pineqartunut ilaatinneqarnerat. Tjenestemandinut ataasiakkaanut tunngatillugu tjenestemandinut soraarnerussutisianut aaqqissuussineq imatut isikkoqarpoq annertussuseqarlunilu, maleruagassanik tjenestemanditut aningaasarsiaminnit annertunerusumik soraarnerussutisianut ileqqaarnissamik tjenestemandinut pisussaaffiliisunik pisariaqartitsisoqarpassigani.

Inatsisip akuerineqareernerata kingorna paasinarsisimavoq, Kalaallit Nunaanni tjenestemandit pillugit inatsit malillugu tjenestemanditut atorfilinnik naalagaaffik suliartortitsisartoq. Tjenestemandit taakkua taamatuttaaq tjenestemanditut allatut maleruagassanik aningaasarsiaminnit soraarnerussutisianut annertunerusumik ileqqaarnissamik pisussaaffiliisunik pisariaqartitsisorineqanngillat. Taamaalilluni ilaatitsinnginnermut maleruagassat aamma tjenestemandit pillugit inatsit naapertorlugu tunniunneqartartut ilaaterlugit, annertusitinneqassasut siunnersuutigineqarpoq.

Siunnersuutigineqarpoq, ileqqaarnissamut pisussaaffeqarnerup annertusitinneqarnera ukiunik marlunnik kinguartinneqassasoq. Taamaalilluni ileqqaarnissamut akigititaq 2021-mi aammalu 2022-imi isertitanut A-nut aamma B-nut 6 procentiunnassaaq, aammalu namminersorluni suliffeqarfimmi sinneqartoorutinut akileraaruteqaataasussanut 2021-imi aamma 2022-imi 4 procentiussalluni. Siunertaavoq innuttaasut ukiuni aggersuni qaninnerni nammineq atuinermi annertusititsinissamut periarfissinneqarnissaat, taamaaliormi Covid 19-ip ajornartorsioritsinerata aningaasaqarnikkut sunniinerlunnissai naatsorsuutigineqartut annikillisinneqarsinnaassallutik.

Pingaartumik aalisarnermit piniarnermillu tunisassianik tunisinermut atatillugu, akiliutit ilannik tunisisup soraarnerussutisianut aaqqissuussinermut akiliisoqartarluni, aaqqissuussinermik pilersitsisoqarsinnaappat, innuttaasunut allaffissornermullu annertuumik iluaqutaassasoq naliliisoqarpoq. Akiliutissap annertussusissaa aallaaviatigut akigititat minnerpaaffianniit annikinnerusariaqarpoq, tassami tunisinermut akiliummi aningaasartuutit tunisisup aalisarnermut imaluunniit piniarnermut atatillugu aningaasartuutigisimasai ilanngaatigineqartanngimmata. Taamatut aaqqissuussinermik pilersitsinissaq pineqartut akuusut nammineerlutik isumaqatigiissutigippassuk naapertuunnerpaassaaq. Taamaattoq pisisut tamarmik peqataanissaat pingaaruteqarpoq, taamaalilluni tunisisut ilai pisisussat arlaannut tunisillutik sivikitsumik iluaqutissarsillutik pisoqalissanani. Taamaattumik siunnersuutigineqarpoq, tamanna pisariaqartoq paasinarsissappat, nalunaarummi maleruagassanik attuumassuteqartunik aalajangersaasinnaanissamut Naalakkersuisut piginnaatinneqassasut. Tamatumunnga ataqatigiissillugu siunnersuutigineqarpoq maleruagassanik unioqquitsinermut akiliisitsinernik nalunaarummi aalajangersaasinnaanissamut Naalakkersuisut piginnaatinneqassasut.

Innuttaasoq ukiumi aningaasarsiaqarfiusumi ataatsimi soraarnerussutisianik ileqqaarnermut annikinaarlugu akiliisimappat, nikingassutaasoq akileqqullugu akileraarnermut ingerlatsiviup innuttaasoq qinnuigissavaa. Maleruagassat atuuttut malillugit nikingassutaasup 1.000 koruunit sinnersimappagit, taamatut qinnuiginninneq aatsaat nassiunneqarsinnaavoq. Innuttaasut isertitakinnerpaat aningaasaqarnikkut nammagassaat killilersimaarniarlugit, allatigullu allaffissornikkut nammagassat annikillisinniarlugit annikinnerpaaffissatut killiliussaq taanna 1.000 koruunimik qaffanneqassasoq siunnersuutigineqarpoq, taamaalillutik innuttaasut ukiumi ataatsimi 2.000 koruunimik annikinnerusunilluunniit akiliinngitsoorsimasut, soraarnerussutisianut aqqissuussinerminnut taakkuninnga akiliinissamik pisussaaffilerneqassanatik.

Nikingassutaasoq annikinnerpaaffissatut killiliussamit annertuneruppat, taanna akileraarummot procentiliussamut tapiliussatut imaluunniit akileraarutitut akiligassat (akileraarutitut B-nut akilersuutit) qaffannerisigut akilersinneqarsinnaavoq. Nikingassutaasup qanoq pisoqaatigilersinnaaneranut tunngatillugu ullumikkut killiliisoqanngilaq. Taamaalilluni nikingassutaasoq assersuutigalugu ukiumik 10-inik pisoqaassuseqaraluartoq, tapiliussanik akiliisitsisoqarsinnaavoq imaluunniit akileraarutitut akiligassat qaffaataannik aalajangiisoqarsinnaalluni. Tamanna naapertuutinnigilaq ilaatigullu innuttaasut pisortanit pilersorneqarnermit imminut pilersulernermit ikaarsaarnissaat imaluunniit innuttaasut nunami allami ilinniareerlutik Kalaallit Nunaannut uternissaat ajornakusoornerulersinnaalluni. Taamaattumik siunnersuutigineqarpoq killissaliussamik ilanngussisoqassasoq, taamaalilluni nikingassutaasut, ukioq aningaasarsiaqarfiusoq skattekorteqarfiusoq ukiut 4-t sinnerlugit sioqqullugu ukiumut aningaasarsiaqarfiusumut tunngassuteqartut, akilersinneqartassanatik.

Soraarnerussutisianut kingusissukkut akiliilluni aningaasaqarnikkut iluanaapilunniartoqannginnissaa eqqarsaatigalugu, nikingassutaasut akileraarutitut akiligassat aqutigalugit akilersinneqartussat, annerpaamik 6-eriarluni akilersorneqartussanngorlugit akilersinneqartassasut siunnersuutigineqarpoq. Tamatuma suliaqarnermi kingunerisaanik nikingassutaasoq kingusinnerpaamik ulloq 20. juli akilerneqareersimassaaq.

Tamatuma saniatigut aqqissuussinermut erseqqissaanermullu tunngasunik allanngortitsisoqarpoq.

Inatsisissatut siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Inatsisissatut siunnersuut</i>
	<p style="text-align: center;">§ 1</p> <p>Soraarnerussutisiaqalernissamut aqqissuussinermut peqataasussaataaneq pillugu Inatsisartut inatsisaanni nr. 21, 28. november 2016-imeersumi, Inatsisartut inatsisaanni nr. 16, 12. juni 2019-</p>

	imeersukkut allanngortinneqartumi makkuninnga allanngortitsisoqarpoq:
<p>§ 1. ... <i>Imm. 2.</i> Akiliisarneq kingusinnerpaamik aallartinneqassaaq ukiumi aningaasarsiorfiusumi inuup 18-inik ukioqalerfiata tulliani, ukiumilu aningaasarsiorfiusumi pineqartup soraarninngorfissaa nallerpat unitsinneqarsinnaalluni. <i>Imm. 3.</i> Soraarnerussutisiaqarnissamut aaqqissuussineq soraarnerussutisiaqarnissamut aningaasaateqarfimmi, sillimmasiisarnermik ingerlatsineq pillugu inatsimmi pineqartumi inuunermut soraarnerussutisiaqarnissamulluunniit sillimmasiisarfimmi Finanstilsynimit akuersissummik peqarluni sillimmasiisarnermik ingerlatsisumi pilersinneqarsimassaaq imaluunniit aningaaserivimmi, Kalaallit Nunaanni angerlarsimaffeqartumi imaluunniit aalajangersimasumik ingerlatsiveqartumi kiisalu maani nunami aningaaserivimmik ingerlatsisinnaanissamut Finanstilsynet-dam akuersissuteqartumi.</p>	<p>1. § 1, imm. 2 aamma 3, imatut oqaasertalerneqarput: ” <i>Imm. 2.</i> Akiliisarneq kingusinnerpaamik aallartinneqassaaq ukiumi aningaasarsiorfiusumi inuup 18-inik ukioqalerfiata tulliani, aammalu ukioq aningaasarsiorfiusoq pineqartup soraarnerussutisiaqalertussat ukioqalerfissaa ukiunik 4-nik sioqqullugu unitsinneqarsinnaalluni. <i>Imm. 3.</i> Soraarnerussutisianut aaqqissuussineq soraarnerussutisiaqarnissamut aningaasaateqarfimmi Danmarkimi imaluunniit Kalaallit Nunaanni angerlarsimaffeqartumi, imaluunniit inuunermut imaluunniit soraarnerussutisiaqarnissamut sillimmasiisarfimmi Danmarkimi imaluunniit Kalaallit Nunaanni angerlarsimaffeqartumi, imaluunniit aningaaserivimmi Kalaallit Nunaanni angerlarsimaffeqartumi imaluunniit aalajangersimasumik ingerlatsiveqartumi, pilersinneqarsimassaaq, taamaattoq takuuk imm. 4. Soraarnerussutisiaqarnissamut aningaasaateqarfik, inuunermut imaluunniit soraarnerussutisiaqarnissamut sillimmasiisarfik imaluunniit aningaaserivik aningaasalersuineramik suliaqarneq pillugu inatsimmi pineqartunut ilaassasoq aammalu allatigut suliaqarneq pineqartoq ingerlannissaanut Finanstilsynemit akuersissummik peqassasoq, piumasaqaataavoq.”</p>
<p>§ 2. Inuup soraarnerussutisiaqarnissamut aaqqissuussineranut ukiumi aningaasarsiorfiusumi akiliutit, ileqqaarnissamut tunngavissat 150.000 kr.-iuppata amerlaneruppataluunniit ileqqaarnissamut tunngavissat 4 procentiin</p>	<p>2. § 2 imatut oqaasertalerneqarpoq: ” § 2. Ileqqaarnissamut tunngaviusut tassaapput inuup A-nit aamma B-nit isertitai katillugit, aningaasat aningaasarsianit akileraarutit pillugit Inatsisartut inatsisaanni § 41, imm. 2, aamma § 47 b,</p>

ikinnerussg Ileqqaarnissamut tunngavissat tassaapput inuup aningaasarsiai Ved B-llu tamarmiusut aningaasanik, aningaasarsianit akileraarutit pillugit Inatsisartut inatsisaanni § 41, imm. 2 naapertorlugu aningaasarsianut akileraaruteqaataasussanut ilanngunneqartussaannngitsunik ilasat, taamaattoq tak. § 4.

§ 4. Ileqqaarnissamut tunngavissanik naatsorsuinermermi makku naapertorlugit tunniunneqartartut ilanngunneqassannngillat:

- 1) Kalaallit Nunaanni Namminersornerullutik Oqartussani kommuninilu tjenestemandit pillugit Inatsisartut inatsisaat,
- 2) Tjenestemandit Inatsisartut suliffeqarfiini atorfillit pillugit Inatsisartut inatsisaat,
- 3) Naalagaaffimmi tjenestemanditut atorfillit Kalaallit Nunaanniittut pillugit inatsit,
- 4) Inuit annertuumik innarluutillit ikiorserneqartarnerat pillugu Inatsisartut peqqussutaat ,
- 5) Meeqqanut tapiissutit pillugit Inatsisartut inatsisaat,
- 6) Meeqqanik inuusuttunillu ikiorsiisarneq pillugu Inatsisartut peqqussutaat,
- 7) Pisortanit ikiorsiissutit pillugit Inatsisartut peqqussutaat,
- 8) Utoqqalinermermi pensionisiat pillugit Inatsisartut inatsisaat,
- 9) Siusinaartumik pensionisiat pillugit Inatsisartut inatsisaat,
- 10) Inissiani attartukkani ineqarnermut tapiissutit pillugit Inatsisartut inatsisaat,
- 11) Ilinniagaqarnersiutit pillugit Inatsisartut inatsisaat, aamma
- 12) Borgmesterinik borgmesterillu tulliinik kiisalu kommunalbestyrelsinit nunaqarfinnilu aqutsisunut ilaasortanik aamma najukkani ataatsimiititaliat

imm. 6 malillugit isertitanik akileraataasussanik naatsorsuinermermi ilaatinneqartussaannngitsut ilassutigalugit, taamaattoq takuuk imm. 2 aamma 3.

Imm. 2. Ileqqaarnissamut tunngaviusut naatsorsorneqarneranni makku naapertorlugit tunniunneqartartut ilanngunneqassannngillat:

- 1) Kalaallit Nunaanni Namminersornerullutik Oqartussani kommuninilu tjenestemandit pillugit Inatsisartut inatsisaat,
- 2) Tjenestemandit Inatsisartut suliffeqarfiini atorfillit pillugit Inatsisartut inatsisaat,
- 3) Naalagaaffimmi tjenestemanditut atorfillit Kalaallit Nunaanniittut pillugit inatsit,
- 4) Tjenestemandit pillugit inatsit
- 5) Inuit innarluutillit taperserneqarnissaannut Inatsisartut inatsisaat,
- 6) Meeqqanut tapiissutit pillugit Inatsisartut inatsisaat,
- 7) Meeqqat taperserorneqarnissaannut Inatsisartut inatsisaat,
- 8) Pisortanit ikiorsiissutit pillugit Inatsisartut peqqussutaat,
- 9) Utoqqalinermermi pensionisiat pillugit Inatsisartut inatsisaat,
- 10) Siusinaartumik pensionisiat pillugit Inatsisartut inatsisaat,
- 11) Inissiani attartukkani ineqarnermut tapiissutit pillugit Inatsisartut inatsisaat,
- 12) Ilinniagaqarnersiutit pillugit Inatsisartut inatsisaat, aamma
- 13) Borgmesterinik borgmesterillu tulliinik kiisalu kommunalbestyrelsinit nunaqarfinnilu aqutsisunut ilaasortanik aamma najukkani ataatsimiititaliat ilaasortaannut il. il. akissarsiaqartitsineq pillugu Namminersorlutik Oqartussat nalunaarutaanni nr. 25, 30. december 2013-imeersumi § 2, § 12 aamma § 14, akissarsiat

<p>ilaasortaannut il. il. akissarsiaqartitsineq pillugu Namminersorlutik Oqartussat nalunaarutaanni nr. 25, 30. december 2013-imeersumi § 2, § 12 aamma § 14, akissarsiat aamma ilaasortaajunnaarnersiutit borgmesterinut taakkulu aappaannut meeraannullu pensionisiaqartitsineq pillugu Namminersorlutik Oqartussat nalunaarutaat nr. 24., 30. december 2013-imeersumi § 10, imm. 3, imaluunniit § 10, imm. 4 naapertorlugit pensionisianut tapiissutinut tunngavissiisut, ilaanatik.</p> <p><i>Imm. 2.</i> Ileqqaarnissamut tunngavissanik naatsorsuinermi makku aamma ilanngunneqassanngillat:</p> <ol style="list-style-type: none"> 1) meeqqanut akilersuutit, inuup angajoqqaavinit pisortanilluunniit akilerneqartussat, aamma 2) pensionisiatut tunniunneqartut allat, Utoqqalinersiaqarneq pillugu Inatsisartut inatsisaanni pineqartunut ilaanngitsut. 	<p>aamma ilaasortaajunnaarnersiutit borgmesterinut taakkulu aappaannut meeraannullu pensionisiaqartitsineq pillugu Namminersorlutik Oqartussat nalunaarutaat nr. 24., 30. december 2013-imeersumi § 10, imm. 3, imaluunniit § 10, imm. 4 naapertorlugit pensionisianut tapiissutinut tunngavissiisut, ilaanatik.</p> <p><i>Imm. 3.</i> Ileqqaarnissamut tunngavissanik naatsorsuinermi makku aamma ilanngunneqassanngillat:</p> <ol style="list-style-type: none"> 1) meeqqanut akilersuutit, inuup angajoqqaavinit pisortanilluunniit akilerneqartussat, aamma 2) pensionisiatut tunniunneqartut allat, Utoqqalinersiaqarneq pillugu Inatsisartut inatsisaanni pineqartunut ilaanngitsut.”
<p>§ 2. Inuup soraarnerussutisiaqarnissamut aaqqissuussineranut ukiumi aningaasarsiorfiusumi akiliutit, ileqqaarnissamut tunngavissat 150.000 kr.-iuppata amerlaneruppataluunniit ileqqaarnissamut tunngavissat 4 procentiinat ikinnerussg Ileqqaarnissamut tunngavissat tassaapput inuup aningaasarsiai Ved B-llu tamarmiusut aningaasanik, aningaasarsianit akileraarutit pillugit Inatsisartut inatsisaanni § 41, imm. 2 naapertorlugu aningaasarsianut akileraaruteqaataasussanut ilanngunneqartussaangitsunik ilasat, taamaattorli tak. § 4.</p> <p><i>Imm. 2.</i> Kisitsit imm. 1-imi taaneqartoq piffissami 2019-imiit 2024-mut ukiumut 1 procentimik qaffattassaaq, kisitsit taamaalilluni 2024-mi 10 procentinngussalluni.</p> <p><i>Imm. 3.</i> Imm. 1-imi aalajangersagaq</p>	<p>3. § 3 imatut oqaasertalerneqarpoq ” § 3. Inuup soraarnerussutisianut aaqqissuussineranut ukiumi aningaasarsiorfiusuni 2021-mi aamma 2022-mi akiliutit, ileqqaarnissamut tunngavissut 150.000 koruuninik amerlanerusunilluunniit annertussuseqarpata, ileqqaarnermut tunngavissut 6 procentiannit annikinnerussanngillat, taamaattoq takuuk imm. 2 aamma 5. Ukiut aningaasarsiorfiusut 2023-miit 2026-mut aallarnerfigalugit ilanngullugillu procentiliusaaq ukiumut 1 procentimik qaffanneqartassaaq, taamaalilluni akigititaq 2026-mi 10 procentiussalluni.</p> <p><i>Imm. 2.</i> Namminersorluni inuussutissarsiornermik suliaqarnermi sinneqartoortit 150.000 koruuninik annertunerusunilluunniit annertussuseqarpata, imm. 1-imi</p>

<p>apeqquataatinnagu inuup soraarnerussutisiaqarnissamut aaqqissuussinerminut akiliutai, sunqartoorutit 150.000 kr.-iuppata amerlaneruppataluunniit, namminersorluni inuussutissarsiummikatingeratussussiqat akutat.</p> <p><i>Imm. 4.</i> Kisitsit imm. 3-mi taaneqartoq piffissami 2019-imiit 2022-mut ukiumut 1 procentimik qaffattassaaq, kisitsit taamaalilluni 2022-mi 6 procentinngussalluni.</p> <p>§ 3. Kisitsit § 2, imm. 1 naapertorlugu atuuttoq inuit ileqqaarnissamut tunngavissaat 100.000 kr.-iuppata kisitsit 0 procentimiit, inuit ileqqaarnissamut tunngavissaat 150.000 kr.-iuppata kisitsit 100 procentimut assigiiaamik qaffakkiartuaassaaq.</p> <p><i>Imm. 2.</i> Kisitsit § 2, imm. 3 naapertorlugu atuuttoq inuit sunqartoorutaat 100.000 kr.-iuppata kisitsit 0 procentimit, inuit sunqartoorutaat 150.000 kr.-iuppata kisitsit 100 procentimut assigiiaamik qaffakkiartuaassaaq.</p>	<p>aalajangersagaq apeqquataatinnagu inuup ukiumi aningaasarsiorfiusuni 2021-mi aamma 2022-mi soraarnerussutisianut aaqqissuussinerminut akiliutai akilaraaruteqaataasussat sinneqartoorutit 4 procentiinit annikinnerussanngillat, taamaattoq takuuk imm. 5. Ukiumi aningaasarsiorfiusumi 2023-mi akiliutit namminersorluni inuussutissarsiornermik suliaqarnermi akileraaruteqaataasussat sinneqartoorutit 5 procentiinit annikinnerussanngillat aammalu 2024-mit ukiumilu aningaasarsiorfiusuni tulliini 6 procentiinit annikinnerussanatik.</p> <p><i>Imm. 3.</i> Imm. 1 malillugu akigititaq atuuttoq ileqqaarnissamut tunngaviusut 100.000 koruuninik annertussuseqarpata inunnut akigititap 0 procentianiit ileqqaarnissamut tunngaviusut 150.000 koruuninik annertussuseqarpata inunnut akigititap 100 procentianut assigiimmik qaffakkiartuaartinneqassaaq.</p> <p><i>Imm. 4.</i> Namminersorluni inuussutissarsiornermik suliaqarnermi imm. 2 malillugu akigititaq atuuttoq, sinneqartoorutit 100.000 koruuninik annertussuseqarpata inunnut akigititap 0 procentianiit sinneqartoorutit 150.000 koruuninik annertussuseqarpata inunnut akigititap 100 procentianut assigiimmik qaffakkiartuaartinneqassaaq.</p> <p><i>Imm. 5.</i> Pisuni imm. 1-imi aamma 2-mi taaneqartuni, inuup soraarnerussutisianut aaqqissuussineranut ukiumi isertitaqarfiusumi ataatsimi 200.000 koruuninik imaluunniit annertunerusunik akiliisoqareernerani, akiliisussaataaneq atorunnaassaaq.”</p>
	<p>4. § 4 imatut oqaasertalerneqarpoq: ” § 4. Aalisarnermit, piniarnermit, aallaaniarnermit, savaateqarnermit aamma</p>

	<p>kusanartuliornernit tunisassianik tunisinerni akileraarutininik unerartitsinissamut pisussaaffeqartoq, tunisisut soraarnerussutisianut aaqqissuussinerannut akiliutissanut akiliinissamik, pisussaaffeqartoq pillugu maleruagassanik Naalakkersuisut aalajangersaasinnaapput. Akiliutissaq tunisinerup aningaasartaasa ilaannik, § 3, imm. 2 malillugu akigititanit atuuttunit annikinnerusumik, annertussuseqassasoq, Naalakkersuisut tassunga ilanngullugu aalajangersaasinnaapput.</p> <p><i>Imm. 2.</i> Akiliuteqartussaataasup tiguisussap soraarnerussutisianut aaqqissuussinera ilisimasaqarfiginngippagu, akiliutissaq imm. 1-imi taaneqartoq akileraartarnermut ingerlatsivimmut akilernerqarsinnaasoq pillugu maleruagassanik aammattaaq Naalakkersuisut aalajangersaasinnaapput. § 7, imm. 6-imi aamma 7-imi, aamma § 8-mi aalajangersakkat taamatut pisoqarnerani atuutissapput.”</p>
<p>§ 5. Soraarnerussutisiaqarnissamut aaqqissuussineranut akiliutit, aningaasarsianut akileraaruteqaataasussanut ilanngunneqartussat imaluunniit akiliutit, aningaasarsianit akileraaruteqaataasussanit ilanngaatigineqarsinnaanngitsut ileqqaakkat § 2-mi taaneqartutut naatsorsorneranni akileraarutit ilanngaatigineqartinnagit amerlassusiinut naatsorsoqqinneqassapput.</p>	<p>5. § 5-imi allanngortinneqarpoq”§ 2” uunga: ”§ 3”.</p>
<p>§ 7. Akileraaruseriffik, inuup soraarnerussutisiaqarnissamut aaqqissuussineranut akiliutissat minnerpaaffissaannik § 2-mi taaneqartunik ukiumi aningaasarsiorfiusumi qaangiuttumi akiliisoqarsimanera paasiniallugu 31. august nallertinnagu naatsorsuissaaq.</p> <p><i>Imm. 2.</i> Inuup soraarnerussutisiaqarnissamut</p>	<p>6. § 7, imatut oqaasertalerneqarput: ” § 7. Ukiup aningaasarsiorfiusup siuliani inuup soraarnerussutisianut aaqqissuussineranut aningaasat minnerpaaffissaat § 3-mi pineqartut akilernerqarsimanersut, Akileraartarnermut ingerlatsiviup ulloq 31. august tikitsinnagu naatsorsussavaa.</p>

aaqqissuussinernut akiliutissat minnerpaaffissaat inorlugu akiliisoqarsimanagera naatsorsuinerup takutippagu, nikingassut 1.000 kr.-init angineruppat akileraaruseriffiup inuk qinnuigissavaa tainerissutus 4-t qaangiutsinnagit akileeqqullugu, akiliinerlu akileraaruseriffimmut uppersarsaqqullugu.

Imm. 3. Imm. 2-mi piffissaliussaq qaangerneqarpat akileraaruseriffik skattekortimik nutaamik skattebilletsinilluunniit nutaanik sanasinnaavoq, nikingassut procentimut akileraarutissamut tapiliussatut akiligassiissutigalugu. Tapiliussaq annerpaamik tassaassaaq procentit § 2 naapertorlugu atuuttut.

Imm. 4. Akileraaruseriffiup tapiliussaq, tak. imm. 3, akilerneqartoq inuup soraarnerussutisiaqarnissamut aaqqissuussinernut ingerlateqqissavaa.

Imm. 5. Inuup soraarnerussutisiaqarnissamut aaqqissuussinernik atuuttumik peqarnera akileraaruseriffimmit ilisimaneqanngippat, akileraaruseriffiup pineqartoq soraarnerussutisiaqarnissamut aaqqissuussinernik pilersitsissussinnaa, tak. § 8.

Imm. 2. Naatsorsuinerup takutippagu inuup soraarnerussutisianut aaqqissuussinernut akiliutit aningaasat minnerpaaffissaannik annikinnerusut, nikingassutaasoq 2.000 koruuninit annertunerusimappat, inuk soraarnerussutisianut aaqqissuussinernut nikingassutaasoq akilissagaa aammalu akiliineq akileraartarnermut ingerlatsivimmut uppersarsagaa, akileraartarnermut ingerlatsiviup piumasariissavaa.

Imm. 3. Akileraartarnermut Aqutsisoqarfiup ulloq 1. november tikitsinnagu akiliinerup uppersarsaat tigusiannngippagu, nikingassutaasoq akileraarutitut procentiliussamut tapiliussatut imaluunniit akileraarutit qaffannerisigut akilersinneqassaaq. Taamaattoq nikingassutaasut, ukiumut aningaasarsiorfiusumut, ukioq aningaasarsiorfiusoq skattekortip atuuffissaa ukiunik 4-nik sioqqullugu, inissisimasumut, tunngassuteqartut akilersinneqarsinnaanngillat.

Imm. 4. Imm. 3 malillugu tapiliussat ukiup aningaasarsiorfiusup tullianut akigitatut atuuttut annerpaamik annertussuseqarsinnaapput, takuuk § 3, imm. 1 aamma 2. Akileraartarnermut ingerlatsiviup paasiguniuk ukiup aningaasarsiorfiusup ataatsip ingerlanerani inummi nikingassutaasut matussusernissaannut naammattumik akiliisitsisoqarsimasoq, akileraartarnermut ingerlatsivik akileraarummut procentiliussamut ilassusiinani skattekortimik nutaamik tunniussissaaq. Akilersinneqartut inummi nikingassutaasunit annertunerupata, ukiumi aningaasarsiorfiusumi paasineqartumi akileraarutaagallartut aningaasartai isigineqassapput.

	<p><i>Imm. 5.</i> Akileraarutinit allagartanik nutaanik tunniussisoqarpat, nikingaassutaasoq annerpaamik arfinileriarluni akilersuinertut akilersinneqassaaq.</p> <p><i>Imm. 6.</i> Akileraartarnermut ingerlatsiviup nikingassutaasut akilerneqartut, takuuk imm. 3-5, inuup soraarnerussutisianut aaqqissuussineranut nuussavai.”</p> <p><i>Imm. 7</i> Inuk ingerlasumik soraarnerussutisianut aaqqissuussaqqartoq akileraartarnermut ingerlatsiviup ilisimangippagu, imaluunniit soraarnerussutisianut aningaasaateqarfiup imaluunniit soraarnerussutisianik neqerooruteqartup soraarnerussutisianut aaqqissuussinermik pilersitsiviusimasup akileraartarnermut ingerlatsivimmit akiliutinik tiguisarnissaq kissaatiginnippagu, akileraartarnermut ingerlatsivik pineqartumut soraarnerussutisianut aaqqissuussinermik pilersitsisinnaavoq, takuuk § 8.”</p>
	<p>7. § 8 kingorna ilanngunneqarpoq: ” § 8 a. Peqqussutini aalajangersakkanik unioqqutitsinermut akiliisitsinermik pineqaatissiisarneq pillugu maleruagassanik, peqqussutini inatsit naapertorlugu aalajangersarneqartuni aalajangersaasoqarsinnaavoq.</p> <p><i>Imm. 2.</i> Aktiaatileqatigiiffiup, piginneqatigiilluni ingerlatseqatigiiffiup, piginneqatigiiffiup, peqatigiiffiup, sullissiviup imminut pigisup, aningaasaateqarfiup assigisaataluunniit unioqqutitsineranut akiliisitsinermik pineqaatissiisarneq pillugu maleruagassanik, peqqussutini inatsit naapertorlugu aalajangersarneqartuni aalajangersaasoqarsinnaavoq.</p> <p>Namminersorlutik Oqartussat, kommuni imaluunniit kommunit ataatsimoorfiat</p>

	unioqqutitsisuuppata, Namminersorlutik Oqartussat, kommuni imaluunniit kommunit ataatsimoorfiat akiliisitsinermik pineqaatissinneqarsinnaapput. <i>Imm. 3. Akiliisitsinerit imm. 1 imaluunniit 2 malillugu pisussaaffiliunneqartut nunap karsianut tutsinneqassapput.”</i>
	<p style="text-align: center;">§ 2</p> Inatsisartut inatsisaat atuutilerpoq ulloq 1. januar 2021.

3. Pisortanut aningaasaqarnikkut allaffissornikkullu sunniutaasussat

Ileqqaarnissamut pisussaaffeqarnermi qaffaatissaq ukiunik marlunnik kinguartinneqarpat, pisortat akileraarutinit isertitaat qaffassapput, tassami soraarnerussutisianut aaqqissuussinermut akiliutini ilanngaatit annertussusaat annikillisinneqassasut naatsorsuutigineqarmat. Innuttaasut ileqqaariaatsiminnik maleruagassanut allanngortinneqartunut qanoq naleqqussaassanersut, iluanaarutit allannguutaasa annertussusaannut apeqqutaassaaq. Paasissutissat pigineqartut tunngavigalugit tamanna nalilerneqarsinnaangilaq.

Siunnersuutip suliassat pisortat aaqqissuussinermik aqutsinerannut tunngassuteqartut annikillissisagai naatsorsuutigineqarpoq. Tamanna ilaatigut nr. 1, 4, aamma 6-imi allannguutissatut siunnersuutigineqartuni atuuppoq.

Allannguutissatut siunnersuutigineqartut akileraartarnermut ingerlatsivimmi IT atorlugu periaatsimik naleqqussaannermut 500.000 koruuninik ataasiartumik aningaasartuuteqarnermik malitseqqassangatinneqarput.

4. Inuussutissarsiortunut aningaasaqarnikkut allaffissornikkullu sunniutaasussat

Innuttaasut ileqqaariaasiat ileqqaarnissamut pisussaaffeqarnermut maleruagassat allanngortinneqarnerannut naleqqussarneqassappata, siunnersuut inuussutissarsiortunut aningaasaqarnikkut pitsaasumik sunniuteqassasoq naliliisoqarpoq.

Allaffissornikkut siunnersuut aallaaviatigut inuussutissarsiortunut sunniuteqassangilaq. Tunisinermi soraarnerussutisianut akiliutissamik akiliisarnissaq pillugu nalunaarummik aalajangersaanissamut piginnaatitsissut Naalakkersuisut atussappassuk, siunnersuut ilaatigut IT atorlugu periaatsinik naleqqussaannermut aningaasartuuteqarnerulernernik aalajangersimasunik malitseqqassaaq, ilaatigullu suliffeqarfiit allaffissornikkut suliassaannik pineqartunut ilaatinneqartunik annertusititsissalluni. Sunniutissat taakkua nalilernissaannut periarfissaqalersitsisunik paasissutissaqanngilaq. Taamaattoq aningaasartuutit taamatullu allaffissornikkut suliassat akuersaarneqarsinnaasut iluanniissasut ilimagineqarpoq.

5. Avatangiisinut, pinngortitamut inuillu peqqissusaannut sunniutaasussat

Naliliisoqarpoq siunnersuut avatangiisinut, pinngortitamut imaluunniit inuit peqqissusaannut sunniuteqassanngitsoq.

6. Innuttaasunut sunniutaasussat

Ileqqaarnissamut pisussaaffeqarnermi qaffaatissaq ukiunik marlunnik kinguartinneqarpat, ileqqaariaatsiminnik maleruagassanut allanngortinneqartunut naleqqussaassagunik, innuttaasut aningaasat atugassaasat annertusissapput.

Tunisinermi soraarnerussutisianut akiliutissamik akiliisarnissaq pillugu nalunaarummik aalajangersaanissamut piginnaatitsissut Naalakkersuisut atussappassuk, innuttaasut ileqqaarnissamut pisussaaffimminnik naammassinninngitsut amerlassusiisa killilersimaarnissaanut nalunaarut iluaqutaasinnaassaaq, tamannalu pineqartunut iluaqutaasussaavoq.

Annikinnerpaaffissanut killiliussap 1.000 koruuniniit 2.000 koruuninut qaffanneqarnerani innuttaasut soraarnerussutisianut aaqqissuussinerminnut annertunerusumik akiliinissamik piumasqaammik tiguisartut ikilisussaapput. Allanguut pingaartumik isertitakitsunut iluaqutaassasoq naatsorsuutigineqarpoq.

Ukiut akileraarutinit procentiliussamut tapiliussatut imaluunniit akileraarutinit akiliutissat qaffaataattut akiliisitsiviusartussat killilerneqarnissaat pillugu siunnersuut taamatuttaaq innuttaasutut iluaqutaasussatut isigineqarpoq.

7. Sunniutaasussat annertuut allat

Siunnersuut allanik annertuunik sunniuteqassanngatinneqanngilaq.

8. Oqartussanut kattuffinnullu il.il. tusarniaaneq

Siunnersuut piffissami 3. juli – 20. juli 2020 tusarniaaffigineqartunut makkununnga tusarniaassutigineqarpoq:

Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Naalakkersuisut Siulittaasuata Naalakkersuisoqarfia, Isumaginninnermut, Ilaqutariinnermut Inatsisinillu Atuutsitsinnermut Naalakkersuisoqarfik, Inuussutissarsiornermut Naalakkersuisoqarfik, Suliffeqarnermut Naalakkersuisoqarfik, Sulisitsisut, SIK, IMAK, AK, pk.gINPK, ASG, PK, KNAPK, Kalaallit Nunaanni Advokatit, Moderniseringsstyrelsen aamma Illersornissamut ministereqarfik.

Makkununnga tusarniaanermut akissuteqaat tiguneqarpoq: AK, SIK, IMAK, Sulisitsisut, Qeqqata Kommunia, SISA, Bank Nordik aamma Utoqqaat Illersuisuat.

Oqaaseqaatit tiguneqartut matuma kinguliani nalinginnaasumik allallugit allanneqarput, Naalakkersuisut oqaaseqaataat *uingasumik* allanneqarlutik.

SIK-p siunnersuut tapersersinnaavaa. SIK siunnersuummi ilaatinneqartunut assigiinningsunut tapersiinnaavoq, ilanngullugit ileqqaarnissamut pisussaaffiit annertusitinneqarnissaasa ukiunik marlunnik kinguartinneqarnissaa, ileqqaarnissamut pisussaaffeqarneq innuttaasup ukioq isertitaqarfiusoq soraarnerussutisiaqalertussatut ukioqalerfissaa ukiunik 4-nik sioqqullugu atorunnaartarnissaa aammalu annikinnerpaaffissanut killiliussap 2.000 koruuninut qaffanneqarnissaa.

IMAK siunnersuummut tunngatillugu neriulluarpoq aammalu utoqqaat atugarisaat siunnersuummi eqqarsaatigineqarmata nuannaarutigalugu.

Norgemi, Savalimmiuni, Islandimi imaluunniit allami nunami EU-miittumi soraarnerussutisianut aaqqissuussinernut akiliutinut ukiunik marlunnik killiliinermik atuutsitsilernissaq Sulisitsisut (GE) pissutissaqarsorinngilaat, tassami uppernarsaanissamut pisussaaffik aningaasarsiaqartumiimmat.

Aallaaviatigut innuttaasut ataasiakkaat soraarnerussutisianut aaqqissuussinerminnut akiliinerit uppernarsartussaagaat ilumoortoq. Taamaattoq paasissutissat tiguneqartut eqqortuunerisa tamakkiisuunerisalu qulakkeernissaa akileraartarnermut ingerlatsiviup pisussaaffigaa. Assersuutigalugu danskit oqartussaasuinit misissuinermit paasissutissanik, inatsisini piumasagaatit naammassineqarsimanersut nalilersuinissamut atorneqarsinnaasunik, ingerlaavartunik akileraartarnermut ingerlatsivik tigusaqartarpoq. Paasissutissanik taamaattunik nunani allani oqartussanit tigusaqartoqartannigilaq aammalu nunani allani oqartussat suliasaqarfimmi tassani paasissutissanik attuumassuteqartunik paarlaasseqatigiinnissaq pillugu isumaqatigiissuteqarfigineqarsimanatik. Taamaattumik immikkut ittumik akuersissuteqarsinnaanermut tassunga atatillugu ukiunut isertitaqarfiusunut marlunnut piffissamik killiliussamik aalajangersaaneq naleqquppoq.

GE isumaqarpoq aningaasaatinit isertitanit aamma aningaasarsiani ajunngitsorsiassanit soraarnerussutisiassanut akiliisoqartariaqanngikkaluartoq.

Pisuussutinit ajunngitsorsiassanit pissarsiassat, soorlu assersuutigalugu erniat aamma iluanaarutit, aningaasarsiat aamma isertitat allat assigalugit innuttaasunut ataasiakkaanut isertitaapput. Ataasiakkaat suliffeqarlutik inuunermik naggataani isertitaasa apparnerat annertoorujussuussanngitsoq, inatsisissatut siunnersuummi ilaatigut siunnerfigineqarpoq. Tamatuma malitsigisaanik pisuussutinit ajunngitsorsiassanit pissarsiat isertitatut soraarnerussutisianut ileqqaarnernut tunngavissanik naatsorsuinermi ilaatinneqartussatut isigineqarnissaat, pissusissamisoorpoq.

Aningaasarsiani ajunngitsorsiassat akileraarutitigut aningaasarsianit isertitanut nalinginnaasunut sanilliunneqarput. Taakkua sulisartumut aningaasarsiatut nalinginnaasutut naleqarnerat, tamatumunnga pissutaavoq. Taamaattumik taakkua soraarnerussutisianut

tunngavissanik naatsorsuinermi ilaatinnginnissaat tunngavissaqarsorineqanngilaq. Tamatuma saniatigut taamatut ilaatitsinnginneq, aningaasarsiat ilaasa annertunerusut aningaasarsiani ajunngitsorsiassanut nuutillugit, iluanaarniapilunnissamut pissutissaqalersitsisussaavoq, tamannalu innuttaasut aallaaviatigut taamatut aningaasarsiaqartut assigiinngisinneqalernerannik malitseqartussaalluni.

GE isumaqarpoq, suliffeqarfiit sulinermut isumaqatigiissutini pineqartunut ilaatinneqanngippata, soraarnerussutisianut aaqqissuussinermut peqataasussaataitanermut unerartitsinissamik sulisitsisut pisussaaffilerneqarnissaat isumaliutersuutigineqartariaqaraluartoq. Taamaanngippat amerlavallaat akilinngitsuukkaminnik annertuunik akiitsoqalernissaat GE-p aarleqqutigaa.

Matuma siuliani immikkoortoq I-ip ataani oqaatigineqartutut, Naalakkersuisut ataatsimoortumik nalileereerlutik, ilanngullugulu pingaartumik aaqqiissutissap isertitakinnerusunut aningaasaqarnikkut sunniuteqarnerluttussaananeranut, siunnersuummik taamaattumik ilanngussinissaq pissutissaqarsorinngilaat.

Tunitsivimmut tunisinermi, nutserisunut, nipilersortartunut assigisaannullu isertitanik A-nik tunniussinermi, soraarnerussutisianut aaqqissuussinermut peqataasussaataitanermut unerartitsisoqassasoq, inatsimmi aalajangersaasoqartariaqaraluarpoq.

Piniartut, aalisartut il.il. tunisinerannut atatillugu akiliisussaataitaneq pillugu nalunaarummik aalajangersaanissamut piginnaatitsissummik siunnersuut imaqarpoq. Suliassaqarfimmi akiliisussaataitanermik atuutsitsilernissamut tunngavissatut nalunaarut taamaattoq naammassanngitsoq ilimagissallugu, maannakkut pissutissaqanngilaq. soraarnerussutisianut aaqqissuussineq pillugu KNAPK-mut killissaliussanut isumaqatigiissuteqartoqarsimasoq, SISA-p tusarniaanermut akissuteqaamminut atatillugu paasissutissiissutigaa, takukkit matuma kingulianiittut. Tamanna unammilligassat soraarnerussutisianut aaqqissuussinermut peqataasussaataitanermut ingerlaavartumik akiliisarnermi paasinarsimasut ilaasa annertuut iluarsiiiviginissaannut, alloriarneruvoq qujarunneqartoq.

Nutserisunut, nipilersortartunut allanullu tunngatillugu akiliisussaataitaneq pisut ilaanni isertitakinnerpaat eqqarsaatigineqarnissaannut akerliusussaavoq. Eqimattanut taakkununnga A-tut isertitanik akiliinermi akiliisussaataitaneq atulersinneqarpat, taamaaliornerup ilaatigut pineqartup soraarnerussutisianut aaqqissuussivianut ilanngaassillunilu akiliisarneq nassatarissavaa, naak pineqartoq killilimmik isertitaqaraluartoq.

GE isumaqarpoq soraarnerussutisianut qanoq annertutigisunik akiliisoqartariaqaraluarnersoq aningaasanut killiliussamik ilanngussisoqartariaqaraluartoq.

Siunnersuut ilanngunniarneqarpoq

Innuttaasup soraarnerussutisialittut ukioqalernissaa ukiunik 4-nik sioqqullugu akiliisussaataaneq sooq unissanersoq, Qeqqata Kommunia paasisinnaangilaa.

Innuttaasooq soraarnerussutisiaqalertussatut ukioqalersooq, ukiuni isertitaqarfiusuni siusinnerusuniittuni naammattumik akiliisimannginneq pissutigalugu, soraarnerussutisianut aaqqissuussinermut akiliisaannarluni, pisartut ikilisinnissaat, allanngortitsinermi siunertaavoq. Innuttaasooq 2020-mi 66-inik ukioqalernerminut atatillugu soraarninngorpat, pineqartup 2018-imi ileqqaarnissamut pisussaaffini naammassisimanngimmagu, innuttaasooq aamma soraarninngoreernermi kingorna soraarnerussutisianut aaqqissuussinermut akiliisartussaassaaq. Tamanna naapertuutinnigitsutut isigineqartariaqarpoq, taamaattumillu allannguutissatut siunnersuutigineqartumi aaqqinniarneqarluni.

Qeqqata Kommunia isumaqarpoq aamma 100.000 koruuninit annikinnerusumik isertitaqartartut soraarnerussutisianut aaqqissuussinermut akiliisassasut.

Inatsimmi innuttaasut isertitakinnerpaat eqqarsaatigineqartariaqartut Naalakkersuisut suli isumaqarput.

SISA siunnersuummut oqaaseqaatissaqanngilaq. SISA-p oqaatigaa, soraarnerussutisianut aningaasaateqarfik soraarnerussutisianut ileqqaarnerit pillugit K.N.A.P.K.-mut killissanut isumaqatigiissuteqarsimasooq. Killissanut isumaqatigiissut taanna inuussutissarsiortunut piginnittunut taamatullu namminersortunut aammalu K.N.A.P.K.-mi ilaasortanut taakkunanilu inuttanut, atuuppoq.

SISA-p tamatuma saniatigut tikkuarppaa § 1, nr. 3, imm. 3-mut aamma 4-mut nassuiaatini naatsorsuinerit kukkuneqartut.

Naatsorsukkani kukkuneq iluarsineqarpoq.

Illersornissamut ministereqarfik isumaqarpoq inatsimmi § 2-mi ilaatitsinnigiffiusut aamma naalagaaffimmi ataatsimoortunut sulisartut isumaqatigiissutai ilaatilerlugit annertusitinneqartariaqaraluartut. Taamatut annertusititsineq Illersornissamut ministereqarfimmi sulisunut assigiaartitsilissaaq kiisalu kalaallit aamma danskit oqartussaasuinut allaffissornermik pisariinnerulersitsissalluni.

Siunnersuut ilanngunneqanngilaq. Suliaqarnermi Illersornissamut ministereqarfik sulisitsisutut allatuulli taamaaqataanik aningaasarsianik soraarnerussutisianillu tunniussinernik Akileraartarnermut Aqutsisoqarfimmut nalunaarutiginnittartussaavoq. Tamanna nalinginnaasuvoq aammalu pissusissamisoorumik sulisitsisunit pisussaaffigineqarluni. Illersornissaqarfimmi sulisut, pisortat ingerlatsiviini sulisorpassuartut allatuulli, sulisartunut isumaqatigiissutit tungavigalugit atorfinitsinneqartarput, inatsimmi

piumasaqaatit minnerpaaffissaannik annertunerusunik soraarnerussutisianut aaqqissuussinernut akiliisarnermik malitseqartumik. Sulisoq atorfeqarnermini pisussaaffini "qaangerlugu naammassinnissimappat", tamanna pineqartup allanut ataqatigiissillugu pisussaaffini "inorlugit naammassinninnissaanut" periarfissiisarpoq. Assersuutigalugu sulisoq illuutinik attartortitsinermi imaluunniit namminersorluni suliffeqarfimmit isertitaqarpat, tamanna naleqqussinnaavoq.

CS Pensionsfondimut aamma HKKF Fondinut, sakkutuut naalagaasa aamma sakkutuut naalagaaraasa soraarnerussutisiassaannik aqutsisuusunut immikkut aalajangersakkanik ilanngussisoqassasoq Illersornissamut ministereqarfiup siunnersuutigaa, tassami Illersornissamut ministereqarfimmi sulisorpassuit taamaanngippat § 1, imm. 3-mut siunnersuummi (inatsisissatut siunnersuummi nr. 1) pineqartunut ilaasussaassanngimmata.

Aningaasaateqarfiit nittartagaat aallaavigalugit naliliinermi, suliffeqarnermi soraarnerussutisianut aningaasaateqarfiit Finanstilsynimit nakkutigineqartut, tassani pineqarpassippat. Erseqqinnerusunik misissuinerit takutippassuk aningaasaateqarfiit § 1, imm. 3-mut siunnersuummi piimasaqaatinik naammassinninngitsut, allannguutissatut siunnersuuteqarnissaq isumaliutersuutigineqassaaq.

Tusarniaaffigineqartut allat siunnersuummut pingaarutilinnik oqaaseqaateqanngillat.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Imm. 2-mut

Siunnersuutigineqarpoq ukiumut aningaasarsiaqarfiusumut innuttaasup soraarnerussutisiaqalertussat ukioqalerfianut ukiut sisamaannangorpata, soraarnerussutisianut aaqqissuussinermut akiliinissaq pisussaaffiujunnaarsinneqassasoq. Innuttaasooq assersuutigalugu 2025-mi 67-inik ukioqalertussaappat, pisussaaffeqarneq 2021-mit taannalu ilanngullugu atorunnaassaaq. Allannortitsinerup kingunerisaanik soraarnerussutisianut akiliisussaataitanerup atorunnaarnissaanut piffissaq ukiunik sisamanik siuartinneqarpoq. Piffissap ukiunik sisamanik sivilissuseqartup taassuma ingerlanerani sulisartunut isumaqatigiissutit il.il. malillugit imaluunniit nammineq kissaatigisat malillugit soraarnerussutisianut aaqqissuussinermut akiliinissaq, allannortitsinermi akornuserneqanngilaq.

Imm. 3-mut

Soraarnerussutisianut aaqqissuusserit soraarnerussutisiaqarnissamut aningaasaateqarfinni, inuunermut imaluunniit soraarnerussutisiaqarnissamut sillimmasiisarfinni Danmarkimi imaluunniit Kalaallit Nunaanni angerlarsimaffeqartuni imaluunniit aningaaserivinni Kalaallit Nunaanni angerlarsimaffeqartuni imaluunniit aalajangersimasumik ingerlatsiveqartuni pilersinneqarsimassasut, erseqqissarneqassasoq siunnersuutigineqarpoq. Aammattaaq piunasaqaataavoq soraarnerussutisiaqarnissamut aningaasaateqarfiit allallu aningaasalersuinermik suliaqarneq pillugu inatsimmi pineqartunut ilaassasut aammalu taamatut suliaqarnermik ingerlatsinissamut Finanstilsynimit akuersissummik peqassasut. Aallaaviatigut maleruagassat atuutereersut erseqqissarneqarnerat tassani pineqarpoq.

Taamaattoq erseqqissaanerup kingunerisaanik soraarnerussutisianut pilersuisut, nunani allani angerlarsimaffeqartut Danmarkimiinngitsut imaluunniit Kalaallit Nunaanniinngitsut, aningaaserivinnut tunngatillugu Kalaallit Nunaanni aalajangersimasumik ingerlatsiveqartuunngitsut, pilersuisut nunanit allaneersut taakkua danskit oqartussaasuisa akuerisimagaluaaraat, atorneqarsinnaanngillat.

Imm. 4-mut

Suliassanik piffissap ukiunik marlunnik sivilissusillip iluani naammassisussatut naatsorsuutigineqartut suliarineqarnissaannut avataaneersunik sulisussarsilluni pisoqarnissaa siunertaralugu, siunnersuutigineqarpoq soraarnerussutisianut aaqqissuussineq Norge-mi, Savalimmiuni, Islandimi imaluunniit nunami allami EU-mi ilaasortaasumi pilersinneqarsimappat, soraarnerussutisianut aaqqissuussinermut atuutereersumut akiliisarnerit ingerlaannarnissaannut akuersinissamut akileraartarnermut ingerlatsivik piginnaatinneqassasoq.

Nunat taakkua toqqarneqarput, pissutigalugu ilaatigut nunani avannarlerni pineqartuni akileraartarnermut suliaasaqarfimmi annertuumik suleqatigiittoqareermat, aningaasalersuinermik suliaqarneq pillugu inatsimmi EU-mi inatsisitigut tunngavissat aallaavigineqarlutik, taamaattumillu nunani allani taakkunani maleruagassat Danmarkimi aamma Kalaallit Nunaanni atuuttut taamaaqataat atuutissasut naatsorsuutigineqartariaqarluni. Piffissap akuersissuteqarfiusup killeqarnissaata siunnersuutigineqarneranut pissutaavoq, akileraartarnermut ingerlatsiviup soraarnerussutisianut aaqqissuussinerit pineqartut taakkua pillugit nunani pineqartuni paasissutissanik piniarnissamut periarfissaqannginnera.

Qinnuteqaat, atorfininnermut atatillugu aammalu innuttaasup Kalaallit Nunaannut killilimmik imaluunniit tamakkiisumik akileraartussaataitalernerata kingorna qaammatit pingasut qaangiutsinnagit akileraartarnermut ingerlatsivimmu, nassiunneqassaaq. Taamaaliornermi innuttaasut aamma akileraartarnermut ingerlatsiviit taamatut pisoqarnerani inatsisini pisinnaatitaaffiisa paasinarsisinneqarnissaasa pisariaqartinneqarnera eqqarsaatigineqarpoq.

Nr. 2-mut

Imm. 1-imut

Soraarnerussutisianut akiliutit aningaasarsianit akileraarusiisarnermut inatsimmi § 41, imm. 2-mi ilanngutinngikkallarsinnaanermut ilaasut saniatigut soraarnerussutisianut akiliutit aningaasarsianit akileraarutinut inatsimmi § 47 b, imm. 6 malillugu ilanngutinngikkallarsinnaanermi pineqartunut ilaatinneqartut aamma ilaatilerlugit, aalajangersagaq annertusitinneqassasoq siunnersuutigineqarpoq. Soraarnerussutisianut aaqqissuussinerit aningaaserivinni soraarnerussutisianik aaqqissuussinernik soraarnerussutisiaqarnissamut aningaasaateqarfinni aamma inuunermut imaluunniit soraarnerussutisiaqarnissamut sillimmasiisarfinni pilersitsisimasuni, pilersinneqarsimasut, taamaaliornermi sanilliunneqarput.

Imm. 2-mut.

Aalajangersagaq annertunerpaatigut maannakkut atuuttumut § 4, imm. 1-imut assinguvoq. Taamaattoq tjenestemandit pillugit inatsit naapertorlugu tunniussinerit taamatuttaaq naatsorsuinerit tunngavissanik naatsorsuineri ilaatinneqassanngitsut ilanngunneqarluni. Ilanngussinerup malitsigisaanik aalajangersakkami normulersuineri allanngortitsisoqarpoq.

Ilaatitsinnginnermi taamaallaat inatsisini allassimasuni aalajangersakkat naapertorlugit tunniussinerit pineqartunut ilaatinneqarput. Assersuutigalugu tjenestemandit inatsit pineqartut toqqaannartumik malillugit tunniussivigineqartarpata, tunniunneqartartut taakkua inatsimmi maleruagassat nalinginnaasut malillugit pineqartup ileqqaarnissamut tunngavissaanni ilaatinneqassapput.

Imm. 3-mut

Aalajangersagaq maannakkut § 4, imm. 2-mut atuuttumut assinguvoq.

Nr. 3-mut

Aalajangersakkami § 2 aamma § 3 maannakkut atuuttut tunngavigineqarput. Naliliisoqarpoq ataatsimoortillugit allanneqarneranni maleruagassat atuisunut atoruminarnerulissasut.

Tamatuma saniatigut siunnersuutigineqarpoq, ukiumi isertitaqarfiusumi inuup soraarnerussutisianut aaqqissuussineranut 150.000 koruuninik annertunerusunilluunniit akiliisoqarsimappat, akiliisussaataaneq atorunnaassasoq. Akiliisussaataaneq ukiup isertitaqarfiusup tullia aallarnerfigalugu ilanngullugulu atuuteqqilissaaq.

Imm. 1-imut

Siunnersuutip atuunnerani 2021-mi aamma 2022-mi ileqqaarnissamut pisussaaffik 6 procentiutillugu aalajangiusimaannarneqarpoq, taanna maleruagassat atuuttut malillugit 7 aamma 8 procentimut qaffassimasussaagaluarluni.

Imm. 2-mut

Siunnersuutip atuunnerani 2021-mi aamma 2022-mi namminersorluni suliffeqarfimmit sinneqartoorutinut akileraaruteqaataasussanut atatillugu ileqqaarnissamut pisussaaffik 4 procentiutillugu aalajangiusimaannarneqarpoq, taanna maleruagassat atuuttut malillugit 5 aamma 6 procentimut qaffassimasussaagaluarluni.

Imm. 3-mut aamma 4-mut

Siunnersuutigineqarpoq inuit ileqqaarnissamut tunngavissaat 100.000 koruunit aamma 150.000 koruunit akornanni annertussuseqartut, akigititat minnerpaaffissaannik sukkulluunniit atuuttumik akiliuteqassasut. Akiliutissaq inunnut ileqqaarnissamut tunngavissaat 100.000 koruuninik annertussuseqartunut akigititat minnerpaaffissaasa 0 procenteraat, inunnut ileqqaarnissamut tunngavissaat 150.000 koruuninik annertussuseqartunut akigititat minnerpaaffissaasa 100 procentianut qaffakkiartuaassalluni.

2021-mi inuup imm. 1-imi pineqartunut ilaasup ileqqaarnissamut tunngavissai 120.000 koruuniuppata, taamaalilluni akileraaruteqannginnermi minnerpaamik 2.880 koruuninik $((120.000 \text{ kr.} \times 6\%) \times 40\%)$ soraarnerussutisianut aaqqissuussinermut akiliisussaassaaq, inuup ileqqaarnissamut tunngavissaat 150.000 koruuniuppata akileraaruteqannginnermi soraarnerussutisianut aaqqissuussinermut 9.000 koruuninik $((150.000 \text{ kr.} \times 6\%) \times 100\%)$ akiliisussaassalluni.

Taamaaqataanik namminersorluni suliffeqarfimmit sinneqartoorutit akileraaruteqaataasussat 100.001 koruunit aamma 150.000 koruunit akornanni annertussuseqarpata, soraarnerussutisianut aaqqissuussinermut akiliutigineqartussaq, akigititat minnerpaaffissaannit akiligassaq assigiissaartumik qaffakkiartussaaq.

Imm. 5-imut

Siunnersuutikkut qanoq amerlatigisunik soraarnerussutisianut akiliisoqartarnissaanut killiliinissamut kissaateqarneq akuerineqarpoq.

Nr. 4-mut

Suliffeqarfiit aalisarnermit, piniarnermit, aallaaniarnermit, savaateqarnermit kusanartuliornernillu tunisassianik tunisititsisartut, tunisisup soraarnerussutisianut aaqqissuussineranut akiliutissamik akiliisarnissaat pillugu maleruagassanik aalajangersaanissamut Naalakkersuisut piginnaatinneqassasut siunnersuutigineqarpoq.

Akiliutissaq pisisut tunisinermit atatillugu tunniussassa, tunisisup kaaviiartitaatut annertussuseqarmat, kisiannili tunisisup sinneqartoorutiginaq, pisuni taakkunani akigitat § 3, imm. 2 malillugu atuuttunit annikinnerusut atornissaannut Naalakkersuisut piginnaatinneqassasut siunnersuutigineqarpoq. Taamaalilluni innuttaasoq pineqartoq ukiumi aningaasarsiaqarfiusumi ataatsimi, § 3, imm. 1-imi aamma 2-mi maleruagassat pineqartup naammassisinnaalerlugit, soraarnerussutisianut aaqqissuussinermit akiliutissaminik minnerpaamik akiliuteqartussaana, akigititani annikillisani taamaalilluni allangortinneqangilaq.

Suliaqarnermi pisisup innuttaasup soraarnerussutisianut aaqqissuussineq ilaaffigisaa pillugu paasissutissanik aalajangersimasunik tigusaqartarani pisoqartarnissaa ilimanarpoq. Tamanna siunertaralugu siunnersuutigineqarpoq, imm. 1 malillugu akiliutissaq akileraartarnermit ingerlatsivimmut akilerneqarsinnaasoq pillugu maleruagassanik aalajangersaanissamut Naalakkersuisut piginnaatinneqassasut. Akileraartarnermit ingerlatsivik aningaasanik taamaattunik tigusaqarpat, akileraartarnermit ingerlatsiviup akiliutissat tunisisup soraarnerussutisianut aaqqissuussineranut nuussavai imaluunniit akileraartarnermit ingerlatsiviup tunisisup soraarnerussutisianut aaqqissuussinermik ingerlasumik ilaaffeqarnersoq ilisimanngippagu, akileraartarnermit ingerlatsivik pineqartumut soraarnerussutisianut aaqqissuussinermik pilersitsisinnaalluni. § 7, imm. 6-imi aamma 7-imi, aamma § 8-mi maleruagassat matumuuna innersuussutigineqarput.

Nr. 5-imut

Aaqqissuussinikkut allangortitsineq tassani pineqarpoq

Nr. 6-imut

Imm. 1-imut

Aaqqissuussinikkut allangortitsineq tassani pineqarpoq.

Imm. 2-mut

Minnerpaaffissanut killiliusseq 1.000 koruuniniit 2.000 koruuninut qaffanneqassasoq siunnersuutigineqarpoq. Tamatuma saniatigut aaqqissuussinermut tunngasunik allanngortitsisoqassasoq siunnersuutigineqarpoq.

Imm. 3-mut

Maleruagassat atuuttut malillugit innuttaasup nikingassutaasoq, ukiumut aningaasarsiaqarfiusumut siulianut tunngassuteqartoq, akileraartarnermut ingerlatsivimmit ukiumoortumik naatsorsuinerup tignerata kingorna sapaatit akunnerisa 4-t iluanni soraarnerussutisianut aaqqissuussinermut ilaaffigisaminut akilersinnaavaa. Akiliinerit ulloq naatsorsuiffiusoq sioqqullugu imaluunniit sapaatit akunnerisa 4-t taakkua naareernerisa kingorna pisut, ukiumi aningaasarsiaqarfiusumi akilerneqarfimmini akilerneqartutut isigineqassapput.

Maleruagassat taakkua allanngortinneqassasut siunnersuutigineqarpoq, taamaalilluni innuttaasooq aallaaviatigut sukkulluunniit akiliisinnaassalluni aammalu soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaannut ataqatigiissillugu ukiumut aningaasarsiaqarfiusumut siusinnerusumiittumut imaluunniit ingerlasumut tutsinneqarsinnaassalluni. Assersuutigalugu innuttaasup tamanna qinnutigippagu, marsip qaammataani akiliuteqarneq ukiup aningaasarsiaqarfiusup siulianut tutsinneqarsinnaassaaq. Siunnersuut taamaallaat soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaannut tunngatillugu atuuppoq. Taamaattumik allanngortitsineq apeqqutaatinnagu, taamatut akiliuteqarnernut ukiumi aningaasarsiaqarfiusumi sorlermi ilanngaasiisoqarsinnaanersoq, akileraartarnikkut tunngaviusut suli tunngavigineqassapput. Innuttaasooq akiliineq ukiumut isertitaqarfiusumut sorlermut tunngassuteqarnersoq allannagu soraarnerussutisianut aaqqissuussinermut akiliippat, akiliineq ukiumut isertitaqarfiusumut ingerlasumut tunngassuteqartutut isigineqassaaq. Innuttaasumi nikingassutaasut ukiunut isertitaqarfiusunut siusinnerusumiittunut arlalinnut tunngassuteqarpata aammalu pineqartoq nikingassutaasunut tunngassuteqartut allallugu akiliippat, kisianni ukiumik isertitaqarfiusumik taasaqarani, akiliineq ukiumut isertitaqarfiusumut siusinnerpaamiittumut, tamatumalu kingorna siusinnerpaamiittup tullianut, tunngassuteqartutut isigineqassaaq.

Innuttaasooq novembarip aallaqqaataa tikitsinnagu ukiumut aningaasarsiaqarfiusumut siusinnerusumiittumut tunngasunik nikingassutaasunik akiliisimasooq, akileraartarnermut ingerlatsivik uppersaammik tigusaqanngippat, nikingassutaasooq akileraarummut procentiliussanut tapiliussatut imaluunniit akileraarutinut akiliutissanut (akileraarutinut B-nut akilersuutit) qaffaassutitut akilersinneqarsinnaavoq. Tapiliussat aamma qaffaanerit ukiunut aningaasarsiaqarfiusunut arlalinnut tunngasunut nikingassutaasunut matussutissatut atornerqarsinnaapput. Taamaattoq ukiumut aningaasarsiaqarfiusumut, ukioq akiliisitsiviusooq sioqqullugu ukiunit 4-nit siusinnerusumiittunut, tapiliussamik imaluunniit qaffaatinik akiliisitsisoqarsinnaanngilaq.

Aningaasarsiaqartumi assersuutigalugu nikingassutaasut 2018-imut tunngassuteqarpata, 2022-p naanerani nikingassutaasunut matussutissatut tapiliussamik akiliisitsinissaq periarfissaajunnaassaaq.

Imm. 4-mut

Siunnersuutigineqarpoq tapiliussaq akigititatut ukiumi aningaasarsiaqarfiusumi tullermi atuuttutut annerpaamik annertussuseqarsinnaasoq, takukkit § 3, imm. 1 aamma 2. 2022-mi naatsorsuisoqarsimappat 2021-mut pisussaaffinnik sinneruttunik takutitsisumik tapiliussaq 2023-mut skattekortimik tunniussinermi taamaalilluni annerpaamik 7 procentimik annertussuseqarsinnaavoq.

Tamatuma saniatigut inummi nikingassutaasut matussusernissaannut naammattumik akiliisitsisoqarsimasoq paasineqarpat, akileraartarnermut ingerlatsivik skattekortimik nutaamik tapiliussartaqanngitsumik tunniussinissamik pisussaaffilerneqarpoq. Paasissutissat minnerunngitsumik akileraarutit tapiliussallu unerartinneqartut pillugit nalunaaruteqartussaataitaasunit ingerlatsivimmi tiguneqartut aallaavigalugit akileraartarnermut ingerlatsivik ingerlaavartumik malinnaassaaq. Nalunaaruteqarnerit tiguneqartut malillugit paasinarsippat innuttaasumi nikingassutaarussimasoq, innuttaasumut skattekortimik nutaamik nassiussinissaq akileraartarnermut ingerlatsiviup isumagissavaa. Suliaqarnermut tassunga sullissinermi piffissamik atuisoqartussaavoq. Ilaatigut tamanna pissutigalugu skattekortimik tapiliussartaqartumik tiguisut ilai nikingassutaasunit annertunerusumik akiliuteqassasut naatsorsuutigineqarsinnaavoq.

Allaffissorneq eqqarsaatigalugu siunnersuutigineqarpoq aningaasat taakkua ukiumi aningaasarsiaqarfiusumi annertuallaamik akiliisimanerup paasineqarfianni akileraarutaagallartutut isigineqassasut. Siunnersuutip malitsigisaanik aningaasat annertuallaamik akilerneqartut akileraarutaagallartutut isigineqassapput. Tamatuma malitsigisaanik akileraarutimik annertuallaamik akiliutaasimasut, akileraaruserinermik ingerlatsineq pillugu Inatsisartut inatsisaanni § 25-mi maleruagassat malillugit tunniunneqassapput. Innuttaasut tamatut pisoqarnerani assersuutigalugu 2 procentimik pissarsinissamik pisinnaatitaasussaapput, takuuk aalajangersakkami imm. 2.

Innuttaasoq naliliippat pineqartup isertitaanut tunngasut skattekortimik tunniussinermi tunngavigineqartunit annertuumik allaanerusussaasut, innuttaasup akileraartarnermut ingerlatsivik tamatuminnnga allannortitseqqusinnaavaa, takuuk akileraaruserinermik ingerlatsineq pillugu Inatsisartut inatsisaanni § 14. Aamma ukiup ingerlanerani imaluunniit kingusinnerpaamik akileraartarnermut ingerlatsiviup nammineq nalunaarummik tigusaqareernerata kingorna qaammatip ataatsip iluani akileraarutaagallartunik annertuallaanik akiliisimalluni innuttaasoq isumaqarpat, Inatsisartut inatsisaanni § 15-imi aalajangersakkat attuumassuteqartut paasinarsinnaavoq.

Imm. 5-imut

Nikingassutaasut akileraarutininik akiliutissatigut akilersinneqartussaallutik pisoqarnerani siunnersuutigineqarpoq taakkua annerpaamik 6-inngorlugit akilersugassatut akilersinneqassasut. Suliaqarnermi taamaalilluni nikingassutaasut kingusinnerpaamik ulloq 20. juli akilerneqareersimasussaassapput.

Imm. 6-imut

Imm. 4-mi atuutereersup atuutsiinnarnera pineqarpoq, matumanili malitsigisaanik allannguisoqarpoq.

Imm. 7-imut

Pisuni soraarnerussutisianik katersiviup innuttaasup soraarnerussutisianik katersaanut akileraaruseriffiup akiliutaanik soraarnerussutisianik katersiviup tigusiumannginnera passussinnaajumallugu aalajangersagaq allanngortinneqassasoq siunnersuutigineqarpoq.

Nr. 7-imut

§ 7-ip allanngortinneqarta nassatarisaanik malitsigisaanik allanngortitsineq pineqarpoq.

Nr. 8-mut

Siunnersuutigineqarpoq nalunaarutininik Inatsisartut inatsisaat naapertorlugu aalajangersagaasunik unioqqutitsinermut akiliisitsinissanut aalajangersaasoqarsinnaasoq aammalu akiliinissamut akisussaaffik ingerlatseqatigiiffinnut il.il. aamma pisortani oqartussanut atuutsinneqarsinnaasoq.

Siunnersuut siunnersuummi nr. 4-mut ataqatigiissillugu isigineqassaaq.

§ 2-mut

Inatsisartut inatsisaat ulloq 1. januar 2021 atuutilissasoq siunnersuutigineqarpoq.